

REGLUGERÐ

um neyslurými.

I. KAFLI

Gildissvið, markmið og skilgreining.

1. gr.

Gildissvið.

Reglugerð þessi gildir um rekstur og starfsemi neyslurýma sem sett eru á fót á grundvelli 2. gr. a laga nr. 65/1974, um ávana- og fíkniefni, með síðari breytingum.

Ákvarðanir teknar á grundvelli þessarar reglugerðar eru ekki stjórnvaldsákvarðanir.

2. gr.

Markmið.

Markmiðið með reglugerð þessari er að setja ramma um rekstur og starfsemi neyslurýma. Starfsemi neyslurýmis skal rekin með skaðaminnkun að leiðarljósi.

3. gr.

Skilgreining á neyslurými.

Neyslurými er lagalega verndað umhverfi þar sem neytendur sem eru 18 ára og eldri geta sprautað ávana- og fíkniefnum í æð undir eftirliti starfsfólks og gætt er fyllsta hreinlætis, öryggis og sýkingavarna.

II. KAFLI

Rekstur.

4. gr.

Rekstrarleyfi.

Embætti landlæknis veitir sveitarfélagi leyfi til að stofna og reka neyslurými að fenginni umsókn og að því skilyrði uppfylltu að húsnæði neyslurýmis sé í samræmi við ákvæði þessarar reglugerðar.

Með umsókninni skulu fylgja nauðsynleg gögn, svo sem fjárhagsáætlun og húsreglur.

Jafnframt skal húsnæði neyslurýmis vera í samræmi við ákvæði laga nr. 46/1980, um aðbúnað, hollustuhætti og öryggi á vinnustöðum.

Sveitarfélagi er heimilt að fengnu samþykki landlæknis að fela félagasamtökum rekstur neyslurýmis með samningi og nefnist sá aðili þá rekstraraðili.

Embætti landlæknis er heimilt að afturkalla leyfi ef skilyrði fyrir starfsemi og rekstri neyslurýmis samkvæmt reglugerð þessari eru ekki uppfyllt.

5. gr.

Ársskýrsla.

Sveitarfélag skal með ársskýrslu veita Embætti landlæknis upplýsingar um rekstur neyslurýmis sem það hefur fengið leyfi til að stofna og reka.

Í ársskýrslu skulu koma fram upplýsingar um:

- Staðsetningu, opnunartíma og umfang þjónustu sem veitt er í neyslurými.
- Hvernig tekist hefur að uppfylla aðgangsskilyrði skv. 12. gr.
- Fjölda, aldur, kyn og búsetu skráðra notenda á ári hverju og frá upphafi.
- Tegund og magn efna sem tilkynnt hafa verið af notendum í neyslurými.
- Félagslega þjónustu og heilbrigðisþjónustu og hvernig hún hefur verið nýtt.
- Fjölda skammta sem hefur verið neytt.
- Fjölda skipta sem lyf við ofskömmtun á ávana- og fíkniefnum hefur verið notað.
- Fjölda tilvísana til þjónustu utan neyslurýmis og tegundar þjónustu, svo sem vímuefnamedferðar.
- Helstu vandamál sem hafa komið upp og hvernig þau hafa verið leyst.

Skýrslan gildir um almanaksár og skal berast embættinu eigi síðar en í lok febrúar ár hvert.

6. gr.
Staðsetning.

Í samráði við lögreglu í viðkomandi umdæmi skal sveitarfélag taka ákvörðun um staðsetningu neyslurýmis og taka tillit til fjarlægðar við sjúkrahús og aðgengi sjúkrabíla.

III. KAFLI
Þjónusta og aðstaða.

7. gr.
Þjónusta.

Í neyslurými skal:

- a. Þjóða notendum upp á almennar ráðleggingar um sprautubúnað og sprautunotkun og aðrar hættuminni aðferðir við inntöku efna.
- b. Þjóða notendum upp á almenna ráðgjöf um hreinlæti og sjálfshjálp til að koma í veg fyrir sýkingar og draga úr líkum á sjálfsskaða.
- c. Dreifa hreinum sprautubúnaði fyrir hvern notanda og taka við notuðum sprautubúnaði til förgunar.
- d. Hafa eftirlit með notanda í neyslurými.
- e. Veita notendum einstaklingsmiðaða ráðgjöf í tengslum við neyslu.
- f. Þjóða upp á einfalda heilbrigðisþjónustu, svo sem hreinsun sára og mat á sýkingum og meðferð við þeim.
- g. Veita upplýsingar um heilbrigðisþjónustu og félagsþjónustu sem stendur notanda til boða.

8. gr.
Aðstaða.

Í þeim tilgangi að stuðla betur að skaðaminnkun skal rekstraraðili neyslurýmis bjóða notendum upp á sturtuádstöðu og svæði til að jafna sig eftir neyslu.

Einnig skal bjóða upp á einfalda heilbrigðisþjónustu, að minnsta kosti meðhöndlun sára, umbúðaskipti, saumatöku og blóðþrýstingsmælingar, í rými í húsnæði neyslurýmis sem er aðgreind frá neyslurýminu sjálfu. Með sama hætti skal jafnframt bjóða notendum upp á almenna heilsufarsráðgjöf og skoðun, þ.m.t. fræðslu um HIV- og lifrabólgu smitleiðir.

9. gr.
Opnunartími.

Þegar tekin er ákvörðun um opnunartíma neyslurýmis skal taka mið af þörfum notenda og annarri skaðaminnkandi þjónustu sem er í boði í sveitarfélaginu.

IV. KAFLI
Starfsmenn.

10. gr.
Mönnun.

Vaktstjóri neyslurýmis skal hafa menntun á sviði heilbrigðisvísinda.

Á hverri vakt í neyslurými skal ávallt starfa að minnsta kosti einn starfsmaður með menntun á sviði heilbrigðisvísinda og einn starfsmaður með þekkingu á sviði skaðaminnkunar.

Allt starfsfólk neyslurýmis skal reglulega sækja námskeið í skyndihjálp. Auk þess skal tryggja að starfsfólk neyslurýmis hafi grunnþekkingu á hugmyndafræði um skaðaminnkun.

Neyslurýmið skal vera þannig mannað á hverjum tíma að samtímis sé unnt að hafa eftirlit með aðgangi að neyslurýminu, fylgjast með neyslu og veita notendum ráðgjöf um neysluna sem og veita heilbrigðisþjónustu, sé hún í boði í sama húsnæði.

11. gr.

Verkefni starfsfólks.

Hlutverk starfsfólks í neyslurými er að taka á móti einstaklingum skv. 1. mgr. 3. gr. og veita þeim þjónustu skv. 7. gr.

Starfsfólk getur kallað lögreglu til neyslurýmis, telji það að lífi sínu eða heilsu sé ógnað við störf í neyslurými. Jafnframt skal starfsfólk boða lögreglu til neyslurýmis ef þangað kemur notandi með magn efna sem er umfram það magn sem ætlað er til einkaneyslu.

Starfsfólk í neyslurými er óheimilt að aðstoða notendur í neyslurými við að sprauta ávana- og fíkniefnum í æð.

V. KAFLI

Starfsemi o.fl.

12. gr.

Aðgangur að neyslurými.

Einstaklingur fær aðgang að neyslurými þegar hann hefur skráð sig sem notanda í rýminu. Við skráningu þarf einstaklingur að gefa upplýsingar um nafn, aldur, kyn og búsetu. Þegar einstaklingur skráir sig má hann láta skrá gælunafn sem er notað upp frá því.

Með skráningunni samþykkir notandi að fara eftir húsreglum skv. 14. gr.

Notanda er heimilt að hafa í vörslu sinni það magn ávana- og fíkniefna sem hann ætlar að neyta í neyslurýminu og ber að kynna fyrir starfsfólki tegund og magn efnis.

Með því að skrá sig samþykkir einstaklingur að starfsfólk muni geta gripið til viðeigandi ráðstafana ef um ofneyslu er að ræða.

Notandi má ekki fá aðstoð frá öðrum við að neyta efna, hvort sem er frá starfsfólki eða notendum.

Í skráningu notanda felst að hann samþykki að rekstraraðili varðveiti og vinni með persónugreinanlegar upplýsingar með það að markmiði halda utan um tölfræðilegar upplýsingar fyrir ársskýrslu og til að meta áframhaldandi rekstur rýmisins. Auk þess er tilgangur skráningar að geta fylgt málum eftir ef upp kemur smit sem ógnað getur heilsu og lífi starfsmanna og notenda neyslurýmis.

Heimilt er starfsfólki að takmarka fjölda notenda í neyslurými til að tryggja næði notenda og öryggi starfsfólks.

13. gr.

Framfylgd reglna um aðgang.

Starfsfólki neyslurýmis er heimilt að ganga úr skugga um hvort skilyrði fyrir skráningu skv. 12. gr. séu uppfyllt.

Vaktstjóri neyslurýmis ákveður hvort einstaklingi sé synjað um aðgang að neyslurými.

Leiki vafi á því að einstaklingur hafi náð 18 ára aldri er heimilt að krefja viðkomandi um skilríki til að sanna aldur sinn.

14. gr.

Húsreglur í neyslurými.

Rekstraraðili neyslurýmis skal setja húsreglur um hegðun notenda í neyslurými.

Ef notandi brýtur húsreglur er heimilt að vísa viðkomandi úr neyslurýminu um tiltekinn tíma sem vaktstjóri í neyslurými ákveður.

15. gr.

Notendasamráð.

Starfsfólk neyslurýmis skal bjóða notendum upp á notendasamráð í þeim tilgangi að bæta þjónustu sem veitt er í neyslurými.

16. gr.

Neyðarhnappur.

Starfsfólk neyslurýmis skal bera neyðarhnapp sem tengdur skal lögreglunni sem það getur notað ef það telur að sér stafi ógn af hegðun notanda neyslurýmis.

17. gr.

Eftirlit lögreglu.

Lögreglu er heimill aðgangur að neyslurými ef hún hefur rökstuddan grun um að einstaklingur hafi í vörslu sinni ávana- og fíkniefni umfram það magn sem hann ætlar að neyta í neyslurýminu, sbr. 3. mgr. 12. gr.

Lögreglu er heimilt að grípa til aðgerða í neyslurými til að tryggja almannafrið í samræmi við 1. mgr. 15. gr. lögreglulaga nr. 90/1996.

VI. KAFLI

Gildistaka.

18. gr.

Gildistaka.

Reglugerð þessi, sem sett er með vísan til 2. gr. a laga um ávana- og fíkniefni nr. 65/1974, með síðari breytingum, öðlast þegar gildi.

Heilbrigðisráðuneytinu, x. xxx 2020.

Svandís Svavarsdóttir

heilbrigðisráðherra.

Ásthildur Knútsdóttir.

B-deild – Útgáfud.: